

VAN DE RABBEDABBE...

Biste laezer,

Ondanks det gae noe startj mit laeze, is ut veurwoord neet es ierste gesjreeve. Dit maaktj ut sjrieëve durvan waal iets lestiger.

Aangezeen de rest van de tekst al bekindj is en ut gras dus al veur mien veut wiggemeidj is, doon ich toch ein poging dees gezét en ut vasteloavendj sezoeën 2013-2014 in te leije.

Ut aafgelaupe sezoeën waas veur De Rabbedabbe ein topsezoeën. Mit 2 jeugtoppers veurop en eine volle raad jeug dur achteraan waas ut kat in ut bekske! De toezigkinge van inkele vriewilligers om ein level wiejer te gaon, gaaf auch ut signaal det de vasteloavendj nog steeds in Haaler laeftj. Auch in dit sezoeën wille wae gaer laote zeen det in ein klein dörp es Haaler, ut good meugelijk is succesvolle activiteite te organiseere wie ein prinsereceptie, Bóntje Aovendj en eine Optocht.

In mien daagelijkse werkzaamheede waer ich regelmaotig geconfronteerdj mit weurd es flexibele sjil en saamewirking. Door de grooate groep vriewilligers dae bie naogenog iddere activiteit steun verlieentj, blijftj ut meugelijk en hoolbaar om veural de jeugd van Haaler eine geweldjige vasteloavendj te beeje. Gelökkig weite de versjillende vereeniginge van Haaler elkaar te vinje en de krachte te bunjele zoa-es bievueurbielddj tieëdes de noewjaors-receptie. Haaler bedanktj!!

Genog serieuze kal, ut is veural ein fieest van plezeer en stomme zeiver. En dit hoope wae natuurlijk auch dit jaor weer mit uch te kinne veere. Verderop vindj gae eine agenda mit activiteite, woaveur idderein oetgeneuedigdj is. Tot den.

Naames Vastelaoves Vereeniging de Rabbedabbe,

Mario Op 't Root.

PS: de raad van elf is nog neet gehieel compleet. Mochtj gae interesse hóbbe, meldj uch den bie ein van de leede.

MÖPKE...



Este bie de dokter kumpst, vreugdj de receptioniste altieëd woaveur deste kumpst. En den moste in ut biezeen van al die anger minse in de wachtkamer zigke waat dur aan de handj is. Soms is det bis waal lestig. Dur is niks ergers den zo'n recepioniste die perse wildj deste ut heur vertildst mit ein wachtkamer vol patiente. Pas geleeje zoot ich in de wachtkamer en toen kwaam dur eine oajere mins binne. Dae mins ging nao de recepioniste en die vreugdj: "Meneer, waarom wilt u de dokter spreken?" Dae mins zeet: "Dur is iets mis mit miene l*!". De recepioniste kwaod: "Zo'n taalgebruik past hier niet in een volle wachtkamer". "Waorum neet?", zeet dae mins, "Gae vraogdj mich toch woorum ich de dokter wil spraeke?" De recepioniste antwoordje: "U heeft de hele wachtkamer in verlegenheid gebracht. U had moeten zeggen 'er is iets verkeerd met mijn oor of iets dergelijks en bespreek het probleem verder privé met de dokter". Dae mins zeet tege heur: "Gae zootj de minse gein vraoge motte stelle in ein vol wachtkamer es det de minse in verlaegeheid bringtj". Dae mins leep nao boete, wachdje ein paar minute en ging toen weer nao binne. De recepioniste lachdje ingenomme en zag: "Ja ?" "Dur is iets verkieerdj mit mien ooar", zag dae oajere mins. De recepioniste knikdje goedkeurendj omdet dae mins heur advies haaj euvergenomme. "En wat is er verkeerd met uw oor meneer?" "Ich kin dur neet mit pisse!" antjwoordje dae mins!